

Los ntawm Thawj Tswj Hwm
Dieter F. Uchtdorf

Tus Pab Cuam thib Ob hau
Thawj Pawg Thawj Tswj Hwm



Vim Li Cas Peb thiaj Xav Tau cov Yaj Saub?

Vim hais tias Leej Txiv Saum Ntuj Ceeb Tsheej hlub Nws cov me nyuam, Nws tsis tau tso lawv tseg thaum lawv ua lub neej uas txawj tuag no nws tseem qhia thiab koj lawv txoj hau kev. Peb Leej Txiv Saum Ntuj Ceeb tsheej tej kev qhia yeej tsis zoo xws luag li, tsis yog tej yam uas yus xam tau, los yog tej uas yus nrhiav tau hauv ib phau ntawv uas yuav lam yuav hauv ib phau ntawv muag ntawv xwb. Lawv yog ib tug Neeg uas nyob saum ntuj ceeb tsheej uas hlub Nws cov me nyuam, Nws muaj hwj chim txhua nrho thiab tau qhia tej kev txawj ntse no. Nyob hauv Nws tej lus qhia yeej muaj tej yam uas neeg tsis paub txog hauv txhua tiam neeg—uas yog lub hauv paus hauv ntsis rau txoj kev zoo siab hauv lub neej no thiab hauv lub neej tom ntej.

Leej Txiv Saum Ntuj Ceeb Tsheej qhia txoj kev txawj ntse no rau Nws cov me nyuam hauv ntiaj teb no dhau los ntawm Nws cov tub qhe uas yog cov yaj saub (saib Amais 3:7). Txij thaum Adas nyob hauv ntiaj teb no los, Vajtswv hais lus rau Nws cov me nyuam dhau los ntawm cov neeg uas Nws xaiv cia es lawv raug txib los qhia seb Nws xav li cas thiab kom qhuab ntuas lwm leej lwm tus. Cov yaj saub raug kev tshoov siab los ua cov xib hwb thiab yog neeg uas ua tim khawv tshwj xeeb txog Yexus Khetos (saib Q&K 107:23). Tsis yog hais tias cov yaj saub hais lus rau cov neeg hauv lawv lub caij

lub nyoog xwb, tiam sis lawv kuj hais lus rau tib neeg hauv txhua lub caij nyoog. Tib neeg hauv ntau tiam neeg yeej hnov lawv lub suab hu los ua tim khawv seb Vajtswv xav kom Nws cov me nyuam yuav ua li cas.

Niaj hnub no yeej tsis txawv tej tiam neeg thaum ub. Tus Tswv yeej hlub cov neeg hauv peb lub caij lub nyoog ib yam nkaus li Nws hlub cov neeg ntawm tej tiam neeg thaum ub. Ib txoj xov zoo kawg nkaus ntawm txoj Kev Muab Yexus Khetos lub Koom Txoos Txum Tim Rov Qab Los twb yog txoj xov uas qhia tias Vajtswv tseem hais lus rau Nws cov me nyuam! Nws tsis tau khiav nkaum saum ntuj ceeb tsheej tiam sis niaj hnub no los Nws hais lus ib yam li Nws tau hais lus yav thaum ub.

Ntau yam uas tus Tswv qhia Nws cov yaj saub twb yog pab kom peb txhua tus thiab tej xam khoo yuav tsis muaj kev tu siab li. Thaum Vajtswv hais lus, Nws ua li ntawd kom thiaj qhia, txhawb nqa, kho, thiab ceeb toom tau Nws cov me nyuam. Thaum tib neeg thiab tej xam khoo tsis quav ntsej lawv Leej Txiv Saum Ntuj Ceeb Tsheej tej lus qhuab qhia, lawv thiaj muaj feem raug tau kev cov nyom, kev tsim txom thiab kev nyuaj siab.

Vajtswv hlub tag nrho Nws cov me nyuam. Yog vim li ntawd Nws rau siab ntso taij thov peb los ntawm Nws cov yaj saub. Ib yam nkaus li peb xav kom cov neeg uas peb hlub yuav tau tej yam zoo, Leej Txiv Saum Ntuj

Ceeb Tsheej xav kom peb tau tej yam zoo thiab. Yog vim li ntawd Nws cov lus qhuab qhia thiaj tseem ceeb thiab tej thaum muaj kam ceev. Yog vim li ntawd niaj hnuv no Nws tsis tau tso peb tseg tiam sis nws tseem qhia peb los ntawm Nws cov yaj saub seb Nws xav li cas. Peb txoj hmoov thiab lub ntiaj teb no txoj hmoov nyob ntawm seb peb puas yuav mloog lus thiab ua raws li Vajtswv txoj lus uas Nws qhia rau Nws cov me nyuam.

Vajtswv tej lus qhia rau tib neeg sawv daws uas muaj nuj nqi nyob rau hauv phau vaj lug kub Npaiv Npaum, Phau Ntawv Maumoos, phau Lus Qhuab Qhia thiab Kev Khi Lus, thiab phau Hlaws uas Muaj Nqi. Ntxiv rau cov no, tus Tswv hais lus rau peb dhau los ntawm Nws cov tub qhev, yam li Nws yuav ua dua hauv lub tuam rooj sab laj tom ntej no.

Rau nej cov uas xav paub seb puas muaj li—thiab tej zaum yuav nug hais tias, “Niaj hnuv no Vajtswv puas hais lus rau peb?”—kuv thiaj hais tag siab tag ntsws kom nej yuav “los thiab saib” (Yauhas 1:46). Nyeem Vajtswv tej lus uas nyob hauv cov vaj lug kub. Ua tib zoo cuab pob ntseg mloog tej lus hauv lub tuam rooj sab laj uas twb yog Vajtswv lub suab hu dhau los ntawm Nws cov yaj saub hauv lub caij nyoog kawg no. Los, mloog, thiab qhib nej lub siab lub ntsws! Vim yog nej nrhiav “nrog lub siab dawb paug, nrog txoj kev thov tiag tiag, muaj txoj kev ntseeg Khetos, [Vajtswv] yuav ua kom nej paub qhov tseeb ntawm tej ntawd, los ntawm lub hwj chim ntawm tus Vaj Ntsuj Plig Dawb Huv” (Maulaunais 10:4). Los ntawm thiab dhau ntawm lub hwj chim no, kuv thiaj paub tias Yexus Khetos muaj sia nyob thiab coj Nws lub Koom Txoos dhau los ntawm ib tug yaj saub uas muaj sia nyob, uas yog Thawj Tswj Hwm Thomas S. Monson.

Cov kwv tij cov muam es, niaj hnuv no Vajtswv tseem hais lus rau peb. Thiab Nws xav kom tag nrho Nws cov me nyuam yuav mloog thiab ua raws li Nws hais. Thaum peb ua li no, tus Tswv yuav foom koob hmoov thiab txhawb nqa peb, hauv lub neej no thiab hauv lub neej tom ntej tib si.

COV HLUAS

Tus Yaj Saub uas Muaj Sia Nyob Coj Peb Txoj Hau Kev

Los ntawm Christy Ripa

Thaum kuv muaj 16 xyoo, kuv muaj cib fim mus koom lub tuam rooj sab laj es yog thawj zaug kuv tau zaum hauv chav tsev rau rooj sab laj. Kuv tsev neeg nyob hauv lub xeev Oregon tim sab hnuv poob hauv teb chaw Amelikas, thiab peb tau tsav tsheb mus tim Utah yuav koom lub rooj sab laj thiab xa kuv tus nus hlob mus nyob hauv qho chaw qhia cov tub txib.

Kuv tau mus koom lub rooj sab laj muaj lub siab xav tau tus Vaj Ntsuj Plig Dawb Huv txoj kev cob qhia. Yog li ntawd, kuv thiaj tau kev tshwm sim los ntawm tus Vaj Ntsuj Plig uas nyaj kuv yuav tsis tau txais yog tias kuv tsis tau ua tib zoo npaj tos.

Nyob hauv ib tuas, sawv daws tau sawv ntsug thiab hu zaj nkauj hu ua “Coj Peb Kev, Au tus Yehauvas uas Zoo Kawg Nkaus.” Thaum peb hu nkauj ntawd, kuv tau kev tshoov siab kom kuv tsa qhov muag saib ib ncig lub Tsev Rau Rooj Sab Laj. Kuv tau ua li ntawd thiab xav tsis thoob vim muaj ntau txhiab leej neeg uas sib koom siab tsa suab hlo qhuas Vajtswv.

Thaum ntawd ces kuv xav tias kuv zoo li Nifais thaum nws ua yog toog pom tsob ntoo uas cawm tib neeg txoj sia, vim tus Ntsuj Plig qhia kuv tias, “Saib seb” (saib 1 Nifais 11–14). Kuv tau ntsia Thawj Tswj Hwm Thomas S. Monson thiab tau kev tshoov siab hais tias lub Koom Txoos yeej koom ib siab ntawd vim peb muaj ib tug yaj saub uas muaj sia nyob uas coj peb txoj hau kev. Dhau los ntawm tus Vaj Ntsuj Plig Dawb Huv txoj kev ua tim khawv ntawd, kuv thiaj paub tias Thawj Tswj Hwm Monson yog tus yaj saub tseeb rau peb lub caij nyoog, thiab kuv paub tias Yexus Khetos coj lub Koom Txoos no dhau los ntawm nws.



Kev Ntseeg, Tsev Neeg, Kev Pab

Cov Ntxhais hauv Kuv lub Nceeg Vaj

Cia li kawm tej yam no thiab, thaum tsim nyog ua, sib tham txog tej no nrog cov viv ncaus uas koj mus xyuas. Siv tej lus nug no pab koj txhawb koj cov viv ncaus lub zog thiab ua kom lub Koom Haum Niam Tsev muaj feem hauv koj lub neej.

Peb yog peb Leej Txiv Saum Ntuj Ceeb Tsheej cov ntxhais. Nws paub peb, hlub peb, thiab tau npaj ib txoj hau kev rau peb lawm. Ib qho ntawm txoj hau kev ntawd yog kom peb yuav los nyob hauv ntiag teb no kom peb yuav kawm xaiv qhov zoo es tsis xaiv qhov phem. Thaum peb txiav txim ua raws li Vajtswv cov lus txib, peb hwm Nws thiab lees paub tias peb yog Vajtswv cov ntxhais. Lub Koom Haum Niam Tsev pab peb nco qab tias peb yeej los saum ntuj los.

Lub Koom Haum Niam Tsev thiab zaj keeb kwm rau lub koom haum no ntxiv zog thiab txhawb pab peb. Julie B. Beck, lub Koom Haum Niam Tsev tus tuam thawj tswj hwm hais tias: “Vim nej yog Vajtswv cov ntxhais, nej npaj rau kev tsa nto nyob mus ib txhis thiab nej txhua tus muaj poj niam tus cwj pwm thiab ntiag tug hauj lwm. Nej tsev neeg, cov koog zej zog, lub Koom Txoos no thiab txoj kev cawm seej yuav vam meej nyob ntawm seb nej rau siab ntseeg npaum li cas. . . . [Peb Leej Txiv Saum Ntuj Ceeb Tsheej] xav kom lub Koom Haum Niam Tsev yuav pab txhawb nqa Nws cov neeg thiab npaj lawv los txais yuav cov koob hmoov ntawm lub tuam tsev. Nws txhim tsa lub [Koom Haum Niam Tsev] kom pab Nws cov ntxhais ua Nws txoj hauj lwm thiab kom lawv pab txhim tsa Nws lub

nceeg vaj thiab ntxiv zog rau tej yim neeg hauv Xi-oos.”¹

Peb Leej Txiv Saum Ntuj Ceeb Tsheej tau muab hauj lwm rau peb ua los pab txhim tsa Nws lub Nceeg Vaj. Nws kuj tau muab tej yam txiaj ntsim ntawm sab ntsuj plig rau peb xwv kom peb yuav muaj cuab kav ua txoj hauj lwm ntawd. Dhau ntawm lub Koom Haum Niam Tsev, peb muaj cib fim los siv peb tej txiaj ntsim no los ntxiv dag ntxiv zog rau peb tsev neeg, pab cov neeg uas xav tau kev pab, thiab kawm seb peb yuav tsum ua Yexus Khetos cov neeg pab koj li cas.

Thawj Tswj Hwm Dieter F. Uchtdorf, tus Pab Cuam Thib Ob hauv Thawj Pawg Thawj Tswj Hwm, hais txog txoj kev ua ib tug pab koj hais tias: “Thaum ua siab ntev txog kev ua ib tug neeg pab koj, peb qhia hais tias peb muaj kev ntseeg npaum li cas thiab peb xum muaj lub siab xav ua raws li Vatjswv lub siab nyiam tsis ua raws li peb lub siab nyiam.”²

Cia peb nco qab ntsoov tias peb yog Vajtswv cov ntshais thiab sim ua neej nyob ua Nws ib co neeg pab koj. Thaum peb ua li no, peb yuav pab txhim tsa Vajtswv lub nceeg vaj hauv ntiag teb no thiab rais los mus ua neeg uas tsim nyog rov qab mus nrog Nws nyob.

Los ntawm Peb zaj Keeb Kwm

Thaum lub Plaub Hlis Ntuj hnuv tim 28, 1842, tus Yaj Saub Yauxej

Xamiv hais rau cov muam hauv lub Koom Haum Niam Tsev hais tias: “Nim no nej nyob hauv ib qho chaw uas cia nej muaj cuab kav ua raws li nej lub siab nyiam uas yog tej uas Vajtswv twb cog hauv nej lub siab lawm. . . . Yog tias nej ua neej raws li nej tej cai, yuav txwv tsis tau cov tim tswv los ua nej tus khub.”³

Thaum pom lub hwj chim ntawm lub Koom Haum Niam Tsev uas yog kev pab lwm tus neeg thiab pab tib neeg haj yam muaj kev ntseeg, Zina D. H. Young, lub Koom Haum Niam Tsev tus tuam thawj tswj hwm, cog lus rau cov viv ncaus hauv xyoo 1893 tias, “Yog nej yuav nrhiav puag sab hauv nej lub siab, thiab yog tus Tswv tus Ntsuj Plig pab ces, nej yuav pom lub hlaws uas muaj nuj nqis, uas yog zaj lus tim khawv txog txoj hauj lwm no.”⁴

LUS CIM

1. Julie B. Beck, “‘Daughters in My Kingdom’: The History and Work of Relief Society,” *Liahona*, Kaum Ib Hlis Ntuj 2010, 112, 114.
2. Dieter F. Uchtdorf, “The Way of the Disciple,” *Liahona*, Tsib Hlis Ntuj 2009, 76.
3. Joseph Smith, hauv *History of the Church*, 4:605.
4. Zina D. H. Young, “How I Gained My Testimony of the Truth,” *Young Woman’s Journal*, Plaub Hlis Ntuj 1893, 319.

Los ntawm cov Vaj Lug Kub

Xakhaliyas 2:10; Lus Qhuab Qhia thiab Kev Khi Lus 25:1, 10, 16; 138:38–39, 56; “Tsev Neeg: Ib zaj Lus Tshaj Tawm rau lub Ntiag Teb” (*Liahona* thiab *Ensign*, Kaum Ib Hlis Ntuj 2010, 129)

Kuv Yuav Pab Li Cas?

1. Kuv yuav ua li cas pab kuv cov viv ncaus ua tau raws li lawv lub peev xwm vim lawv yog Vajtswv cov ntxhais?

2. Kuv yuav ua li cas muab cov lus ntuas thiab lus ceeb toom rau cov poj niam hauv phau Lus Qhuab Qhia thiab Kev Khi Lus 25 rau hauv kuv lub neej?

Kom tau ntaub ntawv xov xwm ntxiv, cia li txuas rau reliefsociety.lds.org.